

Utoqqarnik paaqqinniffiit il.il. pillugit Inatsisartut peqqussutaat nr. 11 ulloq 30. oktober 1998-imeersoq

Suliassaqartitsiniarnermik inunnillu isumaginninnermik Kalaallit Nunaannut inatsimmi nr. 580-imi 29. november 1978-imeersumi § 2 tunngavigalugu makku aalajangersarneqarput:

Kapitali 1.

Utoqqarnik paaqqinniffinnut il.il. nuunnissami piumassaqaataasut nalinginnaasut.

§ 1. Pensionisiallit namminneq angerlarsimaffimminniiginnarsinnaanngitsut kommunimi utoqqarnik paaqqinniffimmut nuunniallutik qinnuteqarsinnaapput.

Imm. 2. Pensionisiallit paaqqutarineqarnissamik sullinneqarnissamillu kommunip utoqqarnik paaqqinniffiani naammassineqarsinnaanngitsunikpisariaqartitsisut peqqinnissaqarfiup ataani paaqqinniffimmut nuukkumallutik qinnuteqarsinnaapput.

Imm. 3. Pensionisiallit kommunimi utoqqarnik paaqqinniffimmut peqqinnissaqarfiulluunniit ataani paaqqinniffimmut nuukkallarnissaminnik qinnuteqarsinnaapput.

§ 2. Kommunip utoqqarnik paaqqinniffiutaanut peqqinnissaqarfiulluunniit ataani paaqqinniffimmut nuunnissamik qinnuteqaat kommunimi najugarivitami kommunalbestyrelse-mut isumaginninnermi suliassanik ingerlatsisuusumut tunniunneqassaaq.

Imm. 2. Inuit kommunit aggornerisa avataani najugaqartut qinnuteqaataat Isumaginninnermi Pisortaqarfirmut ingerlatinneqartassapput, qinnuteqaallu kommunimut pensionisiallip nuuffigerusutaanut Pisortaqarfiup ingerlateqqittassallugu.

Imm. 3. Kommunip utoqqarnik paaqqinniffiutaani peqqinnissaqarfiulluunniit ataani paaqqinniffimmi najugaqarallarnissamik qinnuteqaatit imm. 1-mi aamma imm. 2-mi aalajangersarneqartutut ingerlatinneqartassapput.

§ 3. Kommunip utoqqarnik paaqqinniffiutaanut peqqinnissaqarfiulluunniit ataani paaqqinniffimmut nuunnissamik qinnuteqaatit nuuttussanik inissiiniartarneq pillugu ataatsimiititaliamit oqartussanit assigiinngitsunit ilaasortaaffigineqartumit suliarineqartassapput.

Imm. 2. Kommunip utoqqarnik paaqqinniffiutaani peqqinnissaqarfiulluunniit ataani paaqqinniffimmi najugaqarallarnissamik qinnuteqaatit imm. 1-imi aalajangersarneqartutut suliarineqartassapput.

Imm. 3. Naalackersuisut nuuttussat pillugit ataatsimiititaliap ilaasortalersorneqarnissaanut sunillu oqartussaaffeqarnissaanut malittarisassat aalajangersassavaat. Malittarisassat taakku Kalaallit Nunaanni Kommuneqarfiit Kattuffiat suleqatigalugu suliarineqassapput.

§ 4. Oqartussaaffeqarfiup qinnuteqaammik Inatsisartut peqqussutaat manna tunngavigalugu suliarinnittuusup qinnuteqartoq suliassamik paasissutisseeqataanermut peqataaqqusinnaavaa.

Imm. 2. Oqartussaaffeqarfiup qinnuteqaammik Inatsisartut peqqussutaat manna tunngavigalugu suliarinnittuusup oqartussaaffeqarfiit allat suliaassap suliarineqarnerani pisariaqartinneqartutut isigineqartunik paasissutissanik tunniusseqqusinnaavai.

Kapitali 2.

Utoqqarnik paaqqinniffinnik il.il. pilersitsineq paaqqinniffinnilu najugaqarneq.

§ 5. Kommuni utoqqarnik paaqqinniffinni inissat pisariaqartinneqartutut amerlassusillit pigineqarnissaat kommunalbestyrelsip qulakkiissavaa.

Imm. 2. Pensionisialinnut sammisassaqaartitsinermik neqeroorutini inissat pisariaqartinneqartutut amerlassusillit pigineqarnissaat kommunalbestyrelsip qulakkiissavaa.

Imm. 3. Utoqqarnik paaqqinniffiit sammisassaqaartitsinermillu neqeroorutit kommunimit pilersinneqarlutillu ingerlanneqassapput.

Imm. 4. Naalackersuisut utoqqarnik paaqqinniffiit pilersinneqarnissaannut, pisatsersorneqarnissaannut, siulersorneqarnissaannut ingerlanneqarnissaannullu malittarisassanik aalajangersaassapput, matumani utoqqarnut paaqqinniffinnut aammalu sammisassaqaartitsinermik neqeroorutitut akiliuteqartarnissamut malittarisassat ilanngullugit eqqarsaatigalugit.

§ 6. Peqqinnissaqarfiup ataani pensionisialinnut paaqqutarineqarnissamik immikkut pisariaqartitsisunut inissanik amerlassusilikkanik inissaqartitseqqullugu kommunalbestyrelsi peqqinnissaqarfimmut isumaqatigiissuteqarsinnaavoq.

Imm. 2. Peqqinnissaqarfik ulloq unnuarlu najugaqarnermi akiliutissamik imm.1 tunngavigalugu akileeqquisassaaq. Akiliutissaq, utoqqarnik paaqqinniffiup ingerlatsinermut ukiumoortumik aningaasartuutai tunngavigalugit naatsorsorneqartartussaq, ukioq ataaseq atuuttussanngorlugu aalajangersarneqartassaaq. Akiliutissaq Naalackersuisut aamma Kalaallit Nunaanni Kommuneqarfiit Kattuffiata akornanni isumaqatigiissuteqarnikkut aalajangersarneqartassaaq.

Kapitali 3.

Naammagittaalliuuteqarsinnaaneq.

§ 7. Kommunalborgstyrelsip aamma Isumaginninnermut Pisortaqarfiup aalajangigaat isumaginninnermut tunngasut siulersorneqarnerat aqqissuunneqarnerallu pillugit Inatsisartut peqqussutaanni aalajangersakkat malillugit naammagittaalliuutigineqarsinnaapput.

Kapitali 4.

Aningaasalersuineq.

§ 8. Kommuni utoqqarnik paaqqinniffiit il.il. sanaartorneqarnerannut ingerlanneqarnerannullu aningaasartuutit kommuninit ataasiakkaanit akilerneqartassapput. Naatsorsuutini saqqummiussisarnermut kukkunersiuinermullu malittarisassat Naalackersuisut aalajangersartassavaat.

§ 9. Kommunini utoqqarnik paaqqinniffinnik il.il. sanaartornermut Landskarsi tapiissuteqarsinnaavoq.

Kapitali 5.

Misileraaneq pillugu aalajangersakkat.

§ 10. Kommunini utoqqarnik paaqqinniffiit il.il. pillugit misileraammik aaqqissuussinernut malittarisassanik Naalakkersuisut peqqussut manna tunngavigalugu aalajangersaasinnaapput.

Imm. 2. Kommunikkaartumik misileraalluni aaqqissuussineq sivilunerpaamik ukiuni pingasuni atuussinnaavoq.

Imm. 3. Kommunikkaartumik misileraalluni aaqqissuussinermi angusarineqartut nassuiaasiornikkut tamanut saqqummiunneqartassapput.

§ 11. Misileraalluni aaqqissuussinernit kommunit aggornerisa avataanniittunut atuuttut § 10-mi aalajangersarneqartutut ittut pillugit malittarisassat Naalakkersuisut aalajangersarsinnaavaat.

Kapitali 6.

Atortuulersitsineq.

§ 12. Inatsisartut peqqussutaat manna 1. marts 1999 aallarnerfigalugu atortuulersinneqarpoq.

Imm. 2. Tamatumunnga peqatigitillugu isumaginninnikkut pensionit utoqqarnillu paaqqinniffiit il.il. pillugit Inatsisartut peqqussutaanni nr. 8-mi 22. oktober 1990-imeersumi kommunini utoqqarnik paaqqinniffiit il.il. pillugit aalajangersakkat atorunnaarsinneqarput.

Imm. 3. Utoqqarnik paaqqinniffiit il.il. pillugit aalajangersakkat pensionit utoqqarnillu paaqqinniffiit il.il. pillugit Inatsisartut peqqussutaat nr. 8, 22. oktober 1990-imeersoq tunngavigalugu aalajangersarneqarsimasut atuutiinnassapput inatsisartut peqqussutaat manna allalluunniit tunngavigalugit taarserneqarnissamik atorunnaarsinneqarnissamilluunniit tungaanut.

Namminersornerullutik Oqartussat, ulloq 30. oktober 1998

Jonathan Motzfeldt

/

Mikael Petersen